

摘藻堂四庫全書薈要

集部

欽定四庫全書薈要

集部

樂城集卷

七

八

詳校官助教

臣常循



欽定四庫全書薈要卷一萬五千二

集部

樂城集卷七

宋 蘇轍 撰

詩五十六首

次韻子瞻送范景仁遊嵩洛

非事役行路不應難  
洛浦花初滿  
嵩高雪尚寒  
平林抽凍筍  
竒艷變山丹  
節物朝朝好  
肩輿步步安  
酴醾釀臘酒  
苜蓿薦朝盤  
得意忘春晚  
逢人語夜闌  
歸休三黜柳賦詠  
五噫鸞鶴老  
身仍健  
鴻飛世共看  
雲移忽千

里世路脫重灘西望應思蜀東還定過韓平川涉清潁  
絕頂上封壇出處看公意令人欲棄官

送蔣夔赴代州教授

憶遊太學十年初猶見胡公豈弟餘遍閱諸生非有道  
最憐能賦似相如青衫共笑方持板白髮相看各滿梳  
暫免百憂趨長吏勉調三寸事新書

次韻宿州教授劉涇見贈

此身雖復類潛夫衰老無心強著書道路不知奔走賤

交遊空恠往還疎弦歌更就三年學簿領唯添一味愚  
它日相逢定何處莫將文采笑空虛

徐州送江少卿

夜雨泗河深曉日輕舟發帆開送客遠城轉高臺沒居  
人永瞻望歸意何倉卒公來初無事豐歲多年麥鈴閣  
渡清風芳樽對佳客登臨未云厭談笑方自適朝廷念  
黷老府寺虛清劇何以寄風流江山遶官宅

次韻子瞻寄眉守黎希聲

眼看狂瀾倒百川孤根漂蕩水無邊思家松菊荒三迳  
回首謳歌沸二天簿領沉迷催我老春秋廢格累公賢  
隣居屈指今誰在一念傷心十五年

轍昔侍先人於京師與希聲隣居太

學前是時公之亡兄與二亡妹皆在今十五年而在者唯公與僕二人言之流涕

### 和李邦直學士沂山祈雨有應

宿雪雖盈尺不救春夏旱吁嗟遍野天不聞歌舞通宵  
龍一戰旋開雲霧布旌旗復遣雷霆助舒卷雨聲一夜  
洗塵埃流入溝河朝不見但見青青黍與禾老農起舞

行人歌汙邪滿車尚可許供輸到骨期無它水行天地  
有常數歲歲出入均無頗半年分已厭枯槁及秋更恐  
憂滂沱誰能且共蛟龍語時布甘澤無庸多

陪子瞻遊百步洪

城東泗水平如席城頭遠山涵落日輕舟鳴榔自生風  
渺渺江湖動顏色中洲過盡石縱橫南去清波頭盡白  
岸邊恠石如牛馬銜尾舳艫誰敢下没人出没湏臾間  
却立沙頭手足乾客舟一葉久未上吳牛回首良間關

風波蕩滴未可觸歸來何事嘗艱難樓中吹角暮煙起  
出城騎火催君還

李邦直見邀終日對卧南城亭上二首

一徑坡陀草木間孤亭勝絕俯川原青天圖畫四山合  
白晝雷霆百步喧煙柳蕭條漁市遠汀洲蒼莽白鷗翻  
客舟何事來忽草逆上波濤吐復吞

東來無事得遨遊奉使清閒亦自由撥棄簿書成一飽  
留連語笑失千憂舊書半卷都如夢清簟橫眠似欲秋



聞說歸朝今不久塵埃還有此亭不

次韻邦直見答二首

真能一醉逃煩暑定勝三杯禦臘寒自有詩書供永日  
莫將絲竹亂風灘舞雩何處歸春莫叩角誰人怨夜漫  
聞道丹砂近有術鉛銖稱火共君看

五斗塵勞尚足留閉門聊欲治幽憂羞為毛遂囊中穎  
未許朱雲地下遊無事會須成好飲思歸時亦賦登樓  
羨君幕府如僧舍日向城隅看浴鷗

再次前韻四首

城頭棟宇恰三間，楚望淒涼弔屈原。  
雨洗山川百里淨，風吹語笑一城喧。  
鄉書莫問經時絕，歲事初驚片葉翻。  
南近清淮鱸膾好，釣筒時問有潛吞。

謬將疎野託交遊，平日論心亦有由。  
科第聯翩叨舊契，利名踈濶少新憂。  
清談已覺忘朱夏，濁酒先防虐素秋。  
多病無聊唯有睡，頻頻詩句未嫌不。

野鶴應疑鳬雁苦，夏蟲未慣雪霜寒。  
隱居顏氏終安巷，

垂釣嚴生自有灘破宅不歸塵可埽下田初種水應漫  
退耕尚作悠悠語拙宦猶須步步看

欲作彭城數月留溪山勸我暫忘憂城頭準擬中秋望  
臺上遷延九日遊嵐氣雨餘侵近郭江聲風送隱危樓  
汀洲聚散知誰在且學漂浮水上鷗

雨中陪子瞻同顏復長官送梁燾學士舟行歸汶  
上

客從南方來信宿北方去手掉木蘭舟不顧長江雨江

昏氣陰黑雨落無朝暮肅肅赴波濤濛濛暗洲渚微涼  
入窻閣斜吹濕蕉苧漂灑正紛紜談笑方客與不知江  
路長但覺青山驚客去浩難追落日平西浦東遊本無  
事愛此山河古周旋樽俎歡邂逅英豪聚茲遊有遺趣  
此樂恐宜屢賤仕迫程期遷延防譴怒秋風日已至輕  
舸行當具陰森古城曲蒼莽交流處懸知別時念將行  
重回顧非緣一寸祿應作三年住

同子瞻泛汴泗得漁酒二詠

江湖性終在平地難久居淥水雨新漲扁舟意自如河  
身縈疋素洪口轉千車願言棄城市長竿夜獨漁

其二

懶思久廢詩病腸不堪酒強顏水石間濫蹟賓主後不  
知白浪翻但恠青山走莫隨使車塵豈畏嚴城斗

明日復賦

放舟城西南却向東南泊朝來雨新霽白水浸城腳古  
汴多流直清泗亦浮沫平吞百澗暴滅盡三洪惡遊人

不勝喜水族知當樂舟行野鳬亂網盡脩鱗躍香醪溜  
白蟻鱗縷填花萼人生適意少一醉皆應諾同遊非偶  
然後會未前約簡書尚見寬行日為公却

贈吳子野道人

食無酒肉腹亦飽室無妻妾身自好世間深重未肯回  
達士清虛輒先了眼看鴻鵠薄雲漢長笑駑駘安棧阜  
腹中夜氣何郁郁海底朝陽常杲杲一塵不顧舊山深  
萬里來看故人老空車獨載王陽橐遠遊屢食安期棗

東州相逢真邂逅南國思歸又驚矯道成若見王方平  
背癢莫念麻姑爪

李邦直出巡青州余不久將赴南都比歸不及見  
矣作詩贈別

東道初來託故人南樓頻上泗河濇江山尚有留人意  
樽俎寧當厭客貧顧我及秋行不久問君觸熱去何因  
西歸涼冷霜風後濁酒清詩誰與親

司馬君實端明獨樂園

子嗟丘中親藝麻邵平東陵親種瓜公今歸去事農圃  
亦種洛陽千本花修篁遶屋韻寒玉平泉入畦紆卧蛇  
錦屏奇種斲巖竇嵩高靈藥移萌芽城中三月花事  
起肩輿遍入公侯家淺紅深紫相媚好重樓多葉爭矜  
誇一枝盈尺不論價十千斗酒那容賒歸來曳履苔徑  
滑醉倒閉門春日斜車輪班班走金轂印綬若若趨朝  
衙世人不顧病楊綰弟子獨有窮侯芭終年著書未曾  
厭一身獨樂誰復加宦遊嗟我久塵土流轉海角如浮



搓歸心每欲自投劾孺子漸長能扶車過門有意奉談  
笑幅巾懷刺無袍韉

送顏復赴闕

簞瓢未改安貧性鳧繹猶傳直道餘不見失官愁感感  
但聞高卧起徐徐居中舊厭軍容講補外仍遭城旦書  
此去將身置何許秋風未免憶鱸魚

王詵都尉寶繪堂詞

侯家玉食繡羅裳彈絲吹竹喧洞房哀歌妙舞奉清觴

白日一醉萬事忘百年將種存慨慷西取庸蜀踐戎羌  
戰袍賜錦盤鵬章寶刀玉玦餘風霜天孫渡河夜未央  
功臣子孫白且長朱門甲第臨康莊生長介冑羞膏粱  
四方賓客坐華堂何用為樂非笙簧錦囊犀軸堆象牀  
竿叉連幅翫雲光手披橫素風飛揚長林巨石挿雕梁  
清江白浪吹粉牆異花沒骨朝露香

徐熙畫花落筆縱橫其子嗣變格以

五色染就不見筆迹謂之沒骨蜀趙昌蓋用此法耳

挾禽猛獸舌齧張騰踏驤褭

聯驕驕噴振風雨馳平岡前數顧陸後吳王老成雖喪

存典常坐客不識視茫洋騏驎飛煙郁芬芳卷舒終日  
未用忙遊意淡泊心清涼屬目俊麗神激昂君不見伯  
孫孟孫俱猖狂千時與事神弗臧

逍遙堂會宿二首

并引

轍幼從子瞻讀書未嘗一日相舍既壯將遊宦四方  
讀常蘇州詩至安知風雨夜復此對床眠惻然感之  
乃相約早退為閒居之樂故子瞻始為鳳翔幕府留  
詩為別曰夜雨何時聽蕭瑟其後子瞻通守餘杭復

移守膠西而輟滯留於淮陽濟南不見者七年熙寧  
十年二月始復會於澶濮之間相從來徐留百餘日  
時宿於逍遙堂追感前約為二小詩記之

逍遙堂後千尋木長送中宵風雨聲誤喜對床尋舊約  
不知漂泊在彭城

秋來東閣涼如水客去山公醉似泥困卧北窻呼不起  
風吹松竹雨淒淒

過張天驥山人郊居

南山莫將歸下訪張夫子黍稷滿秋風蓬麻翳隣里君  
年三十八三十有歸意躬耕奉慈親未覺鉏耰鄙讀書  
北窻竹釀酒南園木松菊半成陰日有幽居喜客來時  
借問問子何年起新求西溪石更築茆堂址但令三歲  
熟此計行亦遂堂成不出門清名滿朝市

魏佛狸歌

魏佛狸飲泗水黃金甲身鐵馬蠶脾睨山川俯盡地畫  
作西方佛名字卷舒三軍如使指奔馳萬夫鑿山背雲

金史四庫全書  
卷七  
中孤月妙無比青蓮湛然俛下視擊鉦卷旆抽行營北  
徐府中軍吏喜度僧築室依雲煙俯窺城郭衆山底興  
亡一瞬五百年細草荒榛沒孤壘

雜興二首

陋巷丈夫病且貧懸鵲百結聊庇身蠕蠕大蟲長孫子  
敗繒弊絮開陽春故襦寬博裹肩膀出沒逡巡初莫畏  
一朝換酒入隣家顧視腰間猶犢鼻入縫循腰還自足  
肌膚轉近尤為福咋皮吮血無已時應待渠家具湯沐

朱輪華蓋事遠遊  
廐無良馬乘疲牛  
青絲玉勒金絡頭  
任重道遠旁人憂  
奔馳往來厯山丘  
騰坑投淖摧轅輶  
已歷復起行未休  
青芻黃梁為君羞  
長路漫漫經九州  
場有白駒胡不收  
饑食玉山飲河流  
朝秣幽冀莫炎陬  
奔雲掣電不少留  
僕夫顧之心懷愁  
王良不生誰與謀  
哀哉駿骨千金酬

贈致仕王景純寺丞

瀟山隱君七十四  
紺瞳綠髮初謝事  
腹中靈夜變丹砂

江上幽居連福地彭城為我住三日明月滿船同一醉  
丹書細字口傳訣顧我沉迷真棄耳年來四十髮蒼蒼  
始欲求方救憔悴它年若訪潯山居慎勿逃人改名字  
初發彭城有感寄子瞻

秋晴卷流潦古汴日向乾扁舟久不解畏此行路難此  
行亦不遠世故方如山我持一寸刃巉絕何由刊念昔各  
年少松筠閤南軒閉門書史叢開口治亂根文章風雲起  
冒險渤澥寬不知身安危俛仰道所存橫流一傾潰萬



類爭崩奔孔融漢儒者本自輕曹瞞誓將貧賤身一悟  
世俗昏豈意十年內日夜增濤瀾生民竟顛顛遊宦豈  
復安水深火益熱人知蹈憂患甄豐且自叛劉歆苟盤  
桓而况我與兄飽食顧依然上願天地仁止此禍亂源  
歲月一徂逝尚能反丘園

次韻子瞻見寄

袞袞河渭濁皎皎江漢清源流既自異美惡終未明嗟  
我頑鈍質乃與公竝生出處每自託謳吟輒嘗賡譬如

病足馬共此千里程勝負坐已決豈待終一枰憶公年  
少時濯濯吐新萌堅姿映松栢直節凌榛荆學成志益  
厲秋霜落春榮澹然養浩氣脫屣遺齊鄉百鍊竟不變  
三年終未鳴區區兩郡守籍籍四海聲年來效瘖默世  
事慵譏評不見室家好恍如揖重城別離長塵垢歲月  
何崢嶸彭門偶會合白髮互相驚受教恐不足吐論那  
復爭疾雷發聾聵清月照昏盲篤愛未忍棄浪云舊齊

名更請問郭許題品要當精

子瞻杭州見寄詩云  
先生別駕舊齊名

將至南京雨中寄王鞏

河牽一線流不斷雨散千絲卷却來煙際橫橋村十里  
船中倦客酒三杯老年轉覺脾嫌濕世路早令心似灰  
賴有故人憐寂寞繫舟待我久徘徊

次韻王鞏見贈

南都逢故人共此一樽渌初來柳吹絮再見風脫木我  
老歡意微頭垂腰背曲羨子方少年健馬走平陸狂歌  
手自拊醉倒頭相觸人生比一瞬世網張萬目但取食

場雞豈掛飛雲鵠彭城久相遲官舍虛東屋重陽試新  
釀謂子當不速胡為聽婦言婉孌自相逐我舟得愁霖  
牽挽脫坑谷風霜作初寒病體欲生粟解子腰下龜換  
酒不須贖照碧凝清光相將飲萸菊

送交代劉莘老

建元一二間多士四方至翩翩下鴻鵠一一挹經緯功  
名更唯諾爵祿相饋遺縱橫聖賢業磊落君臣意慷慨  
魯諸生雍容古君子扶搖雲漢上睥睨千萬里入臺霜

凜然不肯下詞氣失足青冥中投命江湖裏區區留都  
客矯矯當世士空使往來人歎息更相指我生本羈孤  
無食強為吏褰裳避塗泥十載守顛顛逝將老茅屋何  
幸繼前軌念君今尚然顧我真當爾百年同一夢窮達  
浪憂喜有酒慰離愁貧賤非君恥

次韻王鞏九日同送劉莘老

頭上黃花記別時樽中綠酒慰清悲畫船牽挽故不發  
紅粉留連未遽離小雨無端添別淚遙山有意助顰眉

十分酒盞從教勸堆案文書自此辭

次韻王鞏欲往徐州見子瞻以事不成行

河水南來遶郡城銀刀空復銜衙兵交情舊許雞為具  
客信那知鵲妄鳴為婦遲留應未怪還家倉卒定何營  
不關秦女箏聲怨自趨招賢浚上旌

宣徽使張安道生日

從公淮陽今幾年憶持壽箏當公前祝公齒髮老復少  
歲歲不改冰霜顏掃除四海一清淨整頓萬物俱安全

今年見公商丘側奉祠太一真仙官身安氣定色如玉  
脫遺世俗心浩然幽居屢過赤松子長夜親種丹砂田  
此中自有不變地歲閱生日如等閒門前賀客任填委  
世上多故須陶甄秋風坐見蒲柳盡歲晏惟有松栢堅  
斯人未安公未用使公難老應由天

章氏郡君挽詞

子厚母

馮唐垂老郎潛後李白風流罷直餘解組同歸榮故國  
剖符仍得奉安輿家聲未替三公舊葬客應傾數郡車

德映閨門人莫見埋文子細列幽墟

聞王鞏還京會客劇飲戲贈

聞君歸去便招呼笑語不知清夜徂  
結束佳人試銀甲留連狂客惱金吾  
燭花零落玉山倒詩筆欹斜翠袖扶  
暫醉何年依錦瑟東齋還復卧氍毹

次韻王鞏遊北禪

蕭蕭黃葉下城頭頻作野田風  
日秋粗有樽罍隨處好  
顰無敲扑便能幽人稀  
野鳥應同樂水涸遊魚似欲愁



客去知君歡未已  
遶城攜手更遲留

次韻王鞏懷劉革老

兩都來往太頻頻  
真是人間自在人  
十載讀書同白屋  
千金為客買朱唇  
結交京邑傾心肺  
寓思禪宗離垢塵  
為問西歸天祿客  
何時同看洛川神

飲餞王鞏

送君不辦沽斗酒  
撥醅浮蟻知君有  
問君取酒持勸君  
未知客主定何人  
府中杯捲強我富  
案上苜蓿知吾真

空厨赤脚不敢出大堤花艷聊相親愛君年少心樂易  
到處逢人便成醉醉書大軸作歌詩頃刻揮毫千萬字老  
夫識君年最深年來多病苦凌侵賦詩飲酒皆非敵危  
坐看君浮太白

送王鞏兼簡都尉王詵

可憐杜老貧無食杖藜曉入春泥濕諸家厭客頻慙人  
往往閉門不得入我今貧與此老同交遊冷落誰相容  
幸君在此足遊行終日騎馬西復東送君仍令君置酒

如此貧交世安有君歸速語王武子因君回船置十斗  
呂希道少卿松局圖

溪回山石間蒼松立四五水深不可涉上有橫橋渡溪  
外無居人盤石平可住縱橫遠山出隱見雲日莫下有  
四老人對局不回顧石泉雜風松入耳如暴雨不聞人  
世喧自得山中趣何人昔相遇圖畫入紈素塵埃依古  
壁永日奉樽俎隱居畏人知好事竟相誤我來再三嘆  
空有飛鴻慕逝將從之遊不惜爛樵斧

寄孔武仲

濟南舊遊中好學惟君耳君居面南麓洶湧岡巒起我  
來輒解帶簷下炙背睡煎茶食梨栗看君誦書史君歸  
苦倉卒窻戶日摧毀遷居就清曠改築富前址開畦得  
遺植遶壁見題字雲山顧依然簿領輒隨至思君猶未  
忘滿秩行自棄爾來鉅野溢流潦壓城壘池塘漫不知  
亭榭日傾弛官吏困堤障麻鞋汙泥滓別來能幾何陵  
谷既遷徙它日重相逢衰顏應不記

孔君亮郎中新葺闕里西園棄官而歸

宦情牢落苦思歸君側無人留子思手種松筠須灌溉  
親修寢廟憶烝祠定應此去添桃李還似舊塋無棘茨  
他日東遊訪遺烈因公導我謁先師

寄濟南守李公擇

岱陰皆平田濟南附山麓山窮水泉見發越遍溪谷分  
流遶塗巷暖氣烝草木下田滿粳稻秋成比禾菽池塘  
浸餘潤菱芡亦云足辭家四千里恃此慰窮獨公從吳

興來苔雪猶在目應恐齊魯間長被塵土辱不知西垣  
下滉漾千畝渌仰見鷗鷺翻俯視龜魚浴初來厭桴鼓  
稍久捐鞭扑清詩調嘉賓夜話繼華燭飛花暮雪深浮  
蟻糟床熟相對各忘歸西來自嫌速人生每多故樂事  
難再卜鉅野一汗漫河濟相騰蹙流沙翳桑土蛟蜃處  
人屋農畝分沉埋城門遭板築傷心念漂蕩引手救顛  
覆勞苦空自知吁嗟欲誰告遙知舊遊處落落空遺躅  
平生讀書史物理粗能矚歸耕久不遂終作牴羊觸賦

詩心自驚請公再三讀

雪中曾飲李倅釣東軒三絕

衆客喧譁發酒狂  
逡巡密雪自飛揚  
莫嫌作賦無枚叟  
且喜延賓有孝王

雪花如掌墮堦除  
劇飲時看卧酒壺  
半夜瓊瑤深沒膝  
欲歸迷路肯留無

竹裏茅庵雪覆簷  
爐香藹藹著蒲簾  
欲求初祖安心法  
笑我醺然已半酣

張恕寺丞益齋

人生不讀書空洞一無有美君常齋居散帙滿前後開  
編試尋繹閱歲行自富從橫畫圖出次第宮商奏汪洋  
畜江河眇莽包林藪興亡數千歲絡繹皆在口顧念今  
所知頗覺前日陋我家亦多書早歲嘗竊叩晨耕掛牛  
角夜燭借鄰牖經年謝賓客飢坐失昏晝堆甑稍蟠屈  
落筆逢左右樂如聽鈞天醉劇飲醇酎自從厭蓬華誤  
逐功名誘初心一漂蕩舊學皆榛莠失足難遽回撫卷



長自詒幸君無事年謂可終身守春耕不厭深秋穫當  
自受金玉或為災詩書豈相負

除夜會飲南湖懷王鞏

歲晚城東故相家夜聽簾外落瓊花醉眠東閣銀缸暗  
起視中庭風竹斜魯酒近來無奈薄秦箏別後苦聞誇  
思君勸對空陂飲歸去紛如日暮鷗

次韻張恕戲王鞏

去歲此日大雪  
僕醉定國東齋

二君豪俊竝侯家歌舞爭妍不受誇聞道肌膚如素練

更堪鬢髮似飛鷗

送轉運判官李公恕還朝

我行未厭山東遠  
昔遊歷下今梁苑  
官如雞肋浪奔馳  
政似牛毛常黽勉  
幸公四年持使節  
按行千里長相見  
鷹掣秋田伏兔驚  
驥馳平野疲牛勸  
似憐多病與時違  
未惟兩州從事懶  
除書奪去一何速  
歸袖翩然不容挽  
黃河東注竭崑崙  
鉅野橫流入州縣  
民事蕭條委濁流  
扁舟出入隨奔電  
回首應懷微禹憂  
歸朝且喜寧親便

公知齊楚即為魚勸築宣防不宜緩

樂城集卷七

欽定四庫全書薈要卷一萬五千三

集部

樂城集卷八

宋 蘇轍 撰

詩六十八首

寄范文景仁

京城冠蓋如雲屯日中奔走爭市門弊裘瘦馬不知路  
獨向城西尋隱君隱君白髮養浩氣高論驚世門無賓  
欣然為我開東閣明窻淨几舒華茵春天雪花大如手  
九衢斷絕愁四隣平明熟睡呼不覺清詩淥酒時相親

我兄東來自東武走馬出見黃河濱及門却遣不得入  
回顧欲去行無人東園桃李正欲發開門借與停車輪  
青天露坐列觴豆落花飛絮飄衣巾留連四月聽鶗鴂  
扁舟一去浮奔渾人生聚散未可料世路險惡終勞神  
交遊畏避恐坐累言詞欲吐聊復吞安得如公百無忌  
百間廣廈安貧身

次韻王鞏上元見寄三首

棄擲良宵君謂何清天流月鑑初磨莫辭病眼羞紅燭

且試春衫剪薄羅蓮艷參差明繡戶舞腰輕瘦貼驚黿  
少年微服天街濶何處相逢解佩珂

繁燈厭倦作閒遊行到僧居院院留月影隨人深有意  
車音爭陌去如流酒消鑿落寧論斗魚照琉璃定幾頭  
過眼繁華真一夢終宵寂寞未應愁

燈火熏天處處同暗遊應避栢臺驄高情自放喧闌外  
勝事偏多淡泊中平日交遊徒夢想留都歌吹憶年豐  
知君未有南來意歸去相從先與鴻

謝張安道惠馬

從事年來鬢似蓬，破車僦僕衆人中。  
作詩僅比窮張籍，得馬還從老晉公。  
夜起趨朝非所事，曉騎行樂定誰同。  
慣乘款段遊田里，怯聽駸駸兩耳風。

張水部集有謝裴晉公惠馬詩

次韻子瞻贈梁交左藏

彭城欲往臺無檄，初喜東西合為一。  
將軍走馬隨春風，精銳千人森尺籍。  
口占佳句驚衆坐，手練強兵試鳴鏑。  
酒酣起舞花滿地，醉倒不聽人扶出。  
歸來相對如夢寐。



虎踞熊經苦岑寂黃樓方就可同遊飲盡官厨三百石  
寒食遊南湖三首

春睡午方覺隔牆聞樂聲肩輿試扶病畫舫聽徐行適  
性逢樽酒開懷挹友生遊人定相笑白髮近從橫

其二

遶郭春水滿被堤新柳黃官池無禁約野艇得飛揚浪  
泛歌聲遠花浮酒氣香晚風歸棹急細雨濕紅粧

其三

攜手臨池路時逢賣酒壚柳斜低繫纜草綠薦傾壺波  
蕩春心起風吹酒力無冠裳強包裹半醉遣誰扶

觀大閱

承平郡國減兵屯唯有留都一萬人票姚將軍思出塞  
從橫幕府諱和親旌旗不動風將轉部曲無聲馬亦馴  
八陣且留遺法在未湏親試革車塵

送林子中安厚卿二學士奉使高麗二首

東夷從古慕中華萬里梯航今一家夜靜雙星先渡海

風高八月自還槎魚龍定亦知忠信象譯何勞較齒牙  
屈指歸來應自笑手持玉帛賜天涯

官是蓬萊海上仙此行聊復看桑田鯤移鵬徙秋帆健  
潮濶天低曉日鮮平地誰言無嶮岵仁人何處不安全  
但將美酒盈船去多作新詩異域傳

送趙屺祕書還錢塘

世人何局促奔走鬢蒼蒼聞道餘杭守獨遊何有鄉禪  
心朝吐月元氣夜生光清靜安罷瘵寬仁服暴強聲名

高一世風采見諸郎謁帝朱為紱還家綵作裳經過留  
畫舫談笑接清觴問訊頗依舊崢嶸歲自長人生真幾  
許世味不堪嘗歸去聞詩罷求余却老方

馬上見賣芍藥戲贈張厚之二絕

春風欲盡無尋處盡向南園芍藥中過盡此花真盡也  
此生應與此花同

春來便有南園約過盡春風約尚賒綠葉成陰花結子  
便須攜客到君家

答見和

花柳蕭條行已老  
聖賢希闊未嘗中  
眼看芍藥紛紛盡  
賴有櫻桃顆顆同

塵編何用朝朝看  
新釀還須處處賒  
好事若能頻載酒  
不妨時復到楊家

送呂希道少卿知滁州

長恠名卿亦坐曹  
忽乘五馬列旌旄  
才多莫厭官無事  
郡小不妨名自高  
庶子定應牽賦詠  
醉翁聊復繼遊遨

金史四庫全書  
卷八  
試尋苦戰清流下要識經綸帝業勞

次韻張恕春莫

祇言城市無佳處亦有南湖幾度遊  
好雨晴時三月盡啼鶯到後百花休  
老猿好飲常連臂野馬依人自絡頭  
不肯低回池上醉試看生滅水中漚

次韻傅宏推官義方亭

居近古城心自幽簞瓢足用更何求  
鶯飛旋趁春風出龍卧終聞暮雨搜  
科第聯翩收甲乙鄉閭驚恠問因由

隱君淡泊無人識長夏一衫冬一裘

送梁交之徐州

湖水清且深新荷半猶卷未見紅粧窈窕娘先排翠羽  
參差扇水面風生人未知歌傾俯仰長先見岸上遊人  
莫不歸清香入袖涼吹面投壺擊鞠綠楊陰共盡清樽  
餐白飯坐中飛將忽先起輕衫出試彭門遠百步洪西  
白浪翻戲馬臺南雲岫滿江山雄麗信宜人風流孰似  
梁王苑

次韻王鞏見寄

日永官閒自在慵。門前客到未曾通。  
憐君避世都門裏。勸我忘憂酒盞中。  
城下柳陰新過雨。湖邊荷葉自翻風。  
早須命駕追清賞。大字新詩事事工。

次韻李達見贈

太學羣遊經最明。青衫顚顚竟何成。  
虀鹽仍作當年味。名譽飛蠅過耳聲。

次韻秦觀秀才攜李公擇書相訪



濟南三歲吾何求使君後到消人憂君言有客輕公侯  
扁舟相從古揚州致之匹馬恨無力千里相望同異域  
新詩空使四座驚隱居未易凡人測使君南歸無限情  
鴻飛攜書墮我庭此書兼置昔年客袖中秀句淮山青  
老夫強顏依府縣堆案文書本非願清談疊疊解人頤  
安得坐右長相見狂客吾非賀季真醉吟君似謫仙人  
末契長遭少年笑白髮應慙傾蓋新都城酒貴誰當換  
塵埃汙面非良筭歸來泗上苦思君莫待黃花秋爛漫

秦君與家兄子瞻  
約秋後再遊彭城

送龔鼎臣諫議移守青州二首

稷下諸公今幾人  
三為祭酒髮如銀  
梁王宮殿歸留鑰  
尚父山河屬老臣  
沂水弦歌重曾點  
菑川故舊識平津  
過家定有金錢費  
千里爭看衣錦身

面山負海古諸侯  
信美東方第一州  
勝勢未容秦地嶮  
奇花僅比雒城優  
新絲出盎冬裘具  
貢棗登場歲事休  
鈴閣虛閒官釀熟  
應容將佐得遨遊

送余京同年兄通判嵐州

矯矯吳越士遠為并代行寒暄雖云異慷慨慰平生我  
昔在濟南君時事淄青連年食羊炙便欲忘尊羹問君  
棄鄉國何似弊屣輕丈夫事所志歸去無田耕閒官少  
愧恥教子終餘齡定心養浩氣閉目收元精此志我亦  
然偶與長者并會合不可期未易夸者評

次韻王鞏見寄

觸事如棊一一低昏然一睡更何知賈生流落南遷後

陶令衰遲歸去時去住由人真水母簞瓢粗足亦山雌  
年來未省談堯舜一呖麤疎豈足吹

河上莫歸過南湖二絕

西來白水滿南池走馬池邊日落時橋底荷花無限思  
清香乞與路人知

淤田水淺客來遲解舫都門問幾時誰道兩京鷄犬接  
差除屈指未曾知

送提刑孫頎少卿移湖北轉運

持節憂邦刑職業已自簡下車攝留都談笑事亦辦開  
軒揖佳客退食事書卷為政曾幾何清風自無限官居  
歲月迫歸念湖湘遠依依東軒竹凜凜故人面詔書遂  
公私使節許新換舊治行當經家山企可見宦遊得鄉  
國勞苦顧猶願歸旆正滂洋行輶豈容緩

次韻劉涇見寄

天之蒼蒼亦何有亦有雲漢為之章人生混沌一氣耳  
嘿嘿何用知肺腸孔公孟子巧言語剖瓢插竹吹笙簧



含宮吐角千萬變坐令隱伏皆形相我生稟賦本微薄  
氤氲方寸不自藏譬如蘭根在黃土春風驅迫生繁香  
口占手寫豈得已此亦未免物所將方將寂寞自收斂  
不受世俗斗尺量既知仍作未能止紛紜竟亦類彼莊  
煎烹心脾擢胃腎自令鬢髮驚秋霜嗟子獨未知此病  
從橫自恃觜爪剛少年一見非俗物鏘然修竹鳴孤凰  
近來直欲扛九鼎令我畏見筆力强提攜童子從冠者  
揣摩五帝論三皇詩書近日貴新說掃除舊學漫無光

竊攘瞿曇剽李耳牽挽性命推陰陽狂流袞袞去不返  
長夜漫漫未遽央詞鋒俊發魯連子慚愧田巴稱老蒼  
是非得失子自了一醉早醒余所望

城南訪張恕

事似芬絲撥不開秋隨脫葉暗相催城南綠野宜幽步  
水北紅塵漫作堆赤棗青瓜報豐熟黃鷄白酒勸徘徊  
此中真有醇風在一畝何年斲草萊

同李倅釣訪趙嗣恭留飲南園晚衙先歸

城南高樓出喬木下有方塘秋水足新霜未變草木鮮  
晚日旋催梨棗熟雨荒松菊半榛莽風老菰蒲初瑟縮  
門前大路多塵土日中過客無留轂開門却埽如有待  
下馬升堂真不速勸我一振衣上黃臨風共倒樽中渌  
肴蔬草草意不盡絲竹泠泠暗相屬琳宮仙伯自閒暇  
幕府麤官苦煩促晚衙簿領當及期後堂車轄要湏漉  
令人更愧東宮師眷戀溪山棄華屋

次韻轉運使鮮于侁新堂月夜



長愛陶先生閒居棄官後床上卧看書門前自栽柳低  
徊顧微祿畢竟誰挽袖索莫秋後蜂青螢曉天宿惟將  
不繫舟託此春江溜尺書慰窮獨秀句驚枯朽遙知新  
堂夜明月入杯酒千里共清光照我茅簷漏

送梁交供知莫州

猛士當令守四方中原諸將近相望一樽度日空閒暇  
千騎臨邊自激昂談笑定先降敵使詩書仍得靖戎行  
君看宿將何承矩安用摧鋒百戰場

秋祀高禘二絕

蕩蕩巍巍堯舜前一丘惟見栢森然後來秦漢何堪數  
跋扈飛揚得幾年

乾德年中初一新顏垣破瓦委荆榛興亡舉墜干戈際  
閒暇方知國有人

過興教贈釗上人

四十年間此院留臨河看盡往還舟同來竝是三年客  
聽說行藏各自羞

次韻王鞏代書

去年河上送君時我醉看君倒接籬一笑便成經歲隔  
扁舟重到滿城知舊傳北海偏憐客新恠東方苦慙饑  
應笑長安居不易空吟原上草離離

次韻南湖清飲二首

翠箔紅窻映大堤遠來清飲歎參差盈盈積水東西隔  
脉脉幽懷彼此知淥酒謾傳工破悶主人何敢恠顰眉  
明朝看月雲開未試與詹家一問龜

坐客經年半已非喜君重到暫相依不嫌愛酒樽頻倒  
只怕題詩紙屢飛耿耿幽懷誰與愬徐徐細酌未應違  
從今更肯相過否幾誤風吹白版扉

次韻偶成

交情淡泊久彌新吏役縈纏日益紛香火社中真避世  
簿書叢裏強論文樽壘正及明蟾夜舟楫來隨早鴈羣  
世俗如君今有幾真將富貴等浮雲

中秋見月寄子瞻

西風吹暑天益高明月耿耿分秋毫彭城閉門青嶂合  
卧聽百步鳴飛濤使君攜客登燕子月色着人冷如水  
筵前不設鼓與鐘處處笛聲相應起浮雲卷盡流金丸  
戲馬臺西山鬱蟠杯中渌酒一時盡衣上白露三更寒  
扁舟明日浮古汴回首逡巡陵谷變河吞巨野入長淮  
城沒黃流只三版明年築城城似山伐木為堤堤更堅  
黃樓未成河已退空有遺蹟令人看城頭見月應更好  
河流深處今生草子孫幸免魚鼈食歌舞聊寬使君老

南都從事老更貧羞見青天月照人飛鶴投籠不能出  
曾是彭城坐中客

次韻王鞏自詠

平生未省為人忙貧賤安閒氣味長粗免趨時頭似葆  
稍能忍事腹如囊簡書見迫身今老樽酒聞呼首一昂  
欲挽天河聊自洗塵埃滿面鬢眉黃

次韻王鞏同飲王廷老度支家戲詠

白魚紫鱗早霜前有酒何須問聖賢上客遠來工緩頰

雙鬟為出小垂肩新傳大曲皆精絕忽發狂言亦可憐  
莫惟貧家少還往自須先辦買花錢

送王鞏之徐州

遨遊公卿間結交非不足高秋遠行邁黃泥沒馬腹問  
君胡為爾笑指籬間菊故人彭城守久作中朝逐詩書  
自娛戲樽俎當誰屬相望鶴頸引欲往龜頭縮前期失  
不遂浪語頻遭督黃樓適已就白酒行亦熟登高暢遠  
情戲馬有前躅篇章雜笑語行草爛盈幅歸來貯篋笥

把玩比金玉吾兄別我久憂患欲誰告孤高多風霆彈  
射畏顛覆白頭日益新歲寒喜君獨紛紛衆草中冉冉  
凌霜竹恨我閉籠樊無由託君轡

次韻張恕九日寄子瞻

無限黃花簇短籬濁醪霜蟹正堪持坐曹漫爾誇勤瘁  
割肉何妨誚詆欺世外罇罍終自放俗間簿領莫相縻  
茱萸揷遍知人少談笑須公一解頤

王厚詰詩云遙知  
兄弟登高處揷遍

茱萸少  
一人



戲次前韻寄王鞏二首

白馬貂裘錦罽羅離觴激灑手親持頭風欲待歌詞愈  
肺病甘從酒力欺不分歸心太忽草更憐人事苦縈縻  
相逢借問空長歎便舍靈龜看朵頤

細竹寒花出短羅故山耕耒手曾持宦遊暫比鳬鷺集  
歸計長遭句偻欺歌舞夢回空歷記友朋飛去自難縻  
悠悠後會須經歲冉冉霜髭漸滿頤

贈杭僧道潛

月中依松鶴露下抱葉蟬賦形已孤潔發響仍清圓潛  
師本江海浪迹遊市塵髭長不能翦衲壞聊復穿瘦骨  
見圖畫禪心離攀緣出言可人意一一皆自然問師藏  
何深不與世俗傳舊識髯學士復從璉耆年塵埃既脫  
落文彩自精鮮落落社中人如我亦有旃柰何一相見  
撫卷坐長歎歸去勿復言山林信多賢

張安道生日二首

椿年七十二迴新蓬矢桑弧記此晨養就丹砂無上藥

已超諸數自由身中年道路趨真境外物功名委世人  
今夜空庭香火罷定應星斗識天真

十載從公鬢似蓬羨公英氣老猶充生時別得星辰力  
晚歲仍加鼎鼐功世事不堪開眼看勞生漸恐轉頭空  
問公試覓刀圭藥歲歲稱觴此日中

李鈞壽花堂

并叙

尚書郎晉陵李公秉性直而和少從道士得養生法未  
五十去嗜欲老而不衰為南都通守其西堂北牖下池

生菖蒲開花三四分馥可愛以書占之曰此壽考之祥也  
也因名其堂曰壽花而余為作詩記之

石上菖蒲十二節仙人服之好顏色根如蟠龍不可得  
葉中開花誰復識夫子自少讀道書年未五十嗜欲除  
河流通天非轆轤下入金鼎融為珠一醉斗酒心自如  
鬼物窺覷驚睂盱菖蒲花開壽之符白髮變黑顏如朱  
它年三茆訪君廬拍手笑我言不虛

次韻子瞻題張公詩卷後

世俗甘枉尺所願求直尋不知一律訛大樂無完音見  
利心自搖慮害安得深至人不妄言淡如朱絲琴悲傷  
感舊俗不類騷人淫又非避世翁閑嘿遽陽瘖嚶晨  
雞鳴豈問晴與陰世人積寸木坐使高樓岑晚歲卧草  
廬誰聽梁甫吟它年楚倚相儻能記惜惜

次韻廣州陳繹諫議和陳薦宋敏求二龍圖二首  
曾送飛龍白日翔未應中路許還鄉鶴歸仍有當年伴  
松老知經幾度霜城下寶坊聊寄榻朝中振鷺舊成行

相逢出處何須問五嶺清平十月涼

右和彥升寓定力

琳宮清淨思悠哉頗似山林未肯迴五日趨朝真自適  
一樽無事得頻開董狐執筆何時易馬援征蠻未遽來  
奔走安閒誰定是都門攜手一徘徊

右和彥升赴上醴泉

次韻王廷老寄子瞻

歌吹新成百尺臺青山臨水巧崔嵬佳人解作回文語

狂客能鳴摻鼓雷  
擷菊傳杯醒復醉  
採菱盪漿去仍回  
新年聞欲相從飲  
春酒還湏剩作醅

次韻頓起考試徐沂舉人見寄二首

齊楚諸生儼鞞紳  
人人願得出君門  
銜枚勇銳驚初合  
棄甲湏臾訝許奔  
細讀未辭燈損目  
久留終厭棘為藩  
定應親刈翹中楚  
把卷喧呼半夜言

老年從事忝南京  
海內交遊尚記名  
怯見廣場心力破  
厭看細字眼花生  
新科未暇通三尺  
舊曲惟知有六莖

空憶倚樓秋雨霽與君看遍洛陽城

前舉與頓同  
試西京舉人

送李鈞郎中

君家毘陵本江南雖為浙西終未甘風流秀發自不減  
氣質渾樸猶中含敲榜滿前但長嘯簿書堆案常清談  
湖中往往載畫舫竹下小小開茅庵歌吟髣髴類騷雅  
導引委曲師彭聃新茶潑乳睡方覺淥酒傾水醒復酣  
一朝揮手去不顧使我把袂心難堪扁舟水涸費牽挽  
瘦馬雪凍憂朝參一官來往似秋鷺薄俸包裹如春蠶東



南乞麾尚可待白首誰念家無甌

送文與可知湖州

連持梁洋印久作溪山主深知為郡樂但畏買茶苦來  
歸天祿閣坐守登聞鼓九重未明入百避盈庭舞城南  
獨歸卧心事誰當語舊聞吳興勝試問天公取家貧橐  
裝盡歲莫輕帆舉苕溪淨多石弁嶺瘦無土湖藕雪冰絲  
山茶潑牛乳香粳飯玉粒鮮鯽鱠紅縷宮開水精潔人  
寄畫屏住俗吏自難堪詩翁正當與從來思清絕況乃

病新愈團團肘後丹  
曷曷胸中素高卧鎮夸俗清談靜  
煩訴應笑杜紫微湖亭但狂顧

次韻王鞏見寄

池上輕冰暖却開迎春送臘仰銜杯  
君家有酒能無事客醉連宵遣不迴  
詩就滴消盤上蠟信來飄盡嶺頭梅  
商丘冷坐君知否併罄應須有恥壘

喜雪呈鮮于子駿三首

發函寬大一封書卧閣雍容三日餘  
旋見雪花投夜落

未應天意與人疎  
瓦乾浙浙初鳴霰  
畦潤漸漸想沒鉏  
高會梁園遺勝在  
早知詞賦似相如

春秋無麥自當書  
況復秋田水潦餘  
一雪端來救焦槁  
千箱乞與等親疎  
消殘溫癘曾非藥  
蝕遍陳根不用鉏  
猶恐遠村霜未足  
試呼農圃問何如

蠶紙鋪庭幾誤書  
楊花糝逕未春餘  
積隨平野分高下  
舞信微風作密疎  
解使遊人似姑射  
仍令飛鳥變春鉏  
共驚天巧無能學  
造物無心本亦如

次韻文務光秀才遊南湖

料峭東風助臘寒、汀滢白酒借衰顏。滿床書卷何曾讀，  
數步湖光自不閒。夢想綠楊垂後浦，眼看紅杏照前山。  
新春漸好君歸速，不見遊人暮不還。

湖前小山  
曰杏山

子瞻惠雙刀

彭城一雙刀，黃金錯刀鏤。脊如雙引繩，色如青琅玕。開  
匣飛電落入手，清霜寒引之。置膝上，凜然愁肺肝。我衰  
氣力微，覽鏡毛髮斑。誓將斬鯨鯢，靜此滄海瀾。又欲戮

犀兕永息行路難有志竟不從撫刀但長歎接刀淚如  
霰北斗空闌干歸來刈蓬蒿鋤田植芳蘭惜刀不忍用  
用亦非所便棄置塵土中坐使鋒刃利床頭夜生光知  
有蛟龍蟠慚君贈我意時取一磨看

留守與賓客會開元龍興寺觀燈余有故不預中


### 夜登南城

燈引雙旌萬點紅傾城車馬在城東使君行樂人人共  
勸客安眠夜夜同夢想笑談傾滿坐卧聞歌筵逐春風

三更試上南樓看無恨繁星十里中



樂城集卷八



總校官庶吉士

臣

張能照

校對官檢討

臣

龔大萬

謄錄監生

臣

張子誠

欽定四庫全書薈要

集部

崇城集卷九

十

詳校官助教臣常循





欽定四庫全書  
會要卷一萬五千四

集部

樂城集卷九

宋 蘇轍 撰

詩七十首

春日耕者

陽氣先從土脉知  
老農夜起飼牛飢  
雨深一尺春耕利  
日出三竿曉餉遲  
婦子同來相嫵媚  
烏鳶飛下巧追隨  
紛紛政令曾何補  
要取終年風雨時

自柘城還府馬上

春色無人見茲行偶衆先柳黃新過雨麥綠稍鋪田河  
潤兼冰散禽聲向日圓城池高受霧濉渙暖生煙送客  
情初惡還家意稍便旋聞夫事起已過佛燈然簿領何  
時畢塵埃空自憐南湖漸可到早治水蘭船

次韻子瞻人日獵城西

將賢士氣振令肅軍聲悄晨登戲馬臺一試胡騾裏城  
空巷無人里社轉相曉吾公庶無疾但恐園囿小荆榛  
一焚蕩雉兔皆驚矯翩翩白馬將手把青絲挑少小事

邊徼斬刈輕荼蓼殿前賜鞍勒珂月明皎皎自言得所  
事強暴無不了廟筭本詩書下策禁焚燎當令百鍊剛  
甘就一指繞低回未嘗試坐被世人少秋霜一朝下凌  
厲見鷙鳥為君整驕惰重立穰苴表

送鮮于子駿還朝兼簡范景仁

蜀中耆舊今無幾相逢握手堪流涕勸遊潦倒不還家  
舊俗陵遲真委地錢荒粟帛賤如土摧峻荼鹽不成市  
詩書鄉校變古法節行故人安近利欲歸長恐歸不得

歸去相歡定誰是低徊有似羊觸藩眷戀僅同雞擇米  
中山先生昔所愛南都攝尹私相喜窮冬夜長一事無  
燈火相從夜深睡讀書萬卷老不廢感寓百篇深有意  
俗吏惟知畏簡書窮途豈意逢君子春風歸騎忽西顧  
平日高談應且止朝騎足馬事朝謁莫就一床尋夢寐  
猶有城西范蜀公買地城東種桃李花絮飛揚酒滿壺  
談笑從容詩百紙紅塵暗天獨不知白首相看兩無愧  
古人避世金馬門何必柴車返田里

次韻秦觀見寄

東家有賢人西家苦相忽幽蘭委冰霜掩靄特未發春  
風吹芳蕤爛漫安可沒東南信多士人物世不闕考槃  
溪山間自獻恥干謁誰憐幽閒女艷色比南越垂耳困  
鹽車捐金空買骨讀書謝世事閉門動論月予生亦羈  
旅處世常卒卒誰令釣竿手強復此持笏惟餘七尺軀  
空洞中無物時蒙好事過解榻聊一拂野情樂江海夢  
想扁舟兀隱居便醉睡世路多顛蹶榮華一朝事毀譽

百年敬相勸沐咸池陽阿晞汝髮

次韻道潛見寄

蕭蕭華髮映衰容慙愧高僧歎不逢  
遊宦終身空處處塵埃何日退重重  
已甘憔悴雞羣鶴猶勝劬勞旱歲龍  
回首不堪膏火熱試求甘露洒青松

次韻王鞏元日

庭鵲營巢初一枝餘寒未便夾羅衣  
春風娜娜還吹霰歲事駸駸已發機  
上國遨遊誰信老中年情味祇思歸

和詩應覺添新懶過盡長空鴈北飛

送將官歐育之徐州

輕衫駿馬走春風未識彭城氣象雄  
青山只在白門外明月盡屬黃樓中  
五斗濁醪消永日一雙鳴鏑戲晴空  
歸來笑殺幕府客閉戶看書滴滴窮

次韻答王鞏

君家當盛時畫戟擁朱戶中書十八年  
清明日方午形容畫雲閣功業載盟府  
中庭三槐在遺迹百世睹子孫

盡豪俊豈類世寒窶胡為久遭厄黽俛受侵侮往來兩  
都間奔走未安土願言解纓紱歸去事農圃嘉禾根未  
拔且忍俟甘雨拂衣走東臯此語吾不取聊復放襟懷  
清談對僧麈躬耕未可言知田顧乃父

次韻子瞻過淮見寄兼簡孫奕職方三首

出處平生共江淮恨不來宦遊良誤我老病賦懷哉狗  
物終今世量書盡幾堆歸耕少憂患惟有仰春雷

蜀中  
謂田

無水利者  
為雷鳴田



其二

龜山昔同到松竹故依然紅印封鹹豉黃罌分井泉青  
天攜杖處晚日落帆偏無限相思意新詩句句傳

其三

行役饒新喜臨川逢故人相看對泉石憐我在埃塵會  
合終多故分張類有神南遊得如願夢想雲溪春

次韻王鞏留別

決策歸田豈世情網羅從此脫餘生請君速治雞黍具

待我同為沮溺耕秋社相從釀錢飲日高時作叩門聲  
茅廬但恐非君處籍籍朝中望已傾

次韻答孔武仲

白髮青衫不記年相逢一笑暫欣然誦詩疊疊鋸木屑  
展卷駸駸下水船未肯尺尋分枉直自知鑿枘有方圓  
閒官更似揚州學猶得昏昏晝日眠

送傅宏著作歸覲待觀城闕

膠西前輩鄭康成千載遺風及後生舊學詩書儒術富

兼通法律吏能精還家綵服頻為壽得邑河壩喜有兵  
民事近來多迫促弦歌聊試武城聲

律有鄭氏章句

連雨不出寄張恕

麥熟蠶繅熟似烝雨傾三尺未為淫洗清溝澮蚊蚋靜  
沒盡蒲蓮沼沚深遺秉滿田驚朽腐移牀避漏畏侵尋  
高閒祇有張公子卧聽蕭蕭打葉音

和子瞻自徐移湖將過宋都途中見寄五首

東武厭塵土彭門富溪山從兄百日留退食同躋攀輕

帆過百步船底驚雷翻肩輿上南麓眼界涵川原愛此  
忽忘歸願兄且三年我去已忽忽兄來亦奔奔永懷置  
酒地遶郭多雲煙

我昔去彭城明日河流至不見五斗泥但見三竿水驚  
風鬱鬱怒跳沫高睥睨漱灑三月餘浮沉一朝事分將  
食魚鼈何暇顧隣里悲傷念遺黎指顧出完壘繚堞對  
連山黃樓麗清泗功成始逾歲脫去如一屣空使西楚  
祇欲語先垂涕

千金築黃樓落成費百金誰言使君侈聊慰楚人心  
高秋吐明月白壁懸青岑晃蕩河漢高恍恨窻戶深邀我  
三日飲不去如寵禽史君今吳越雖往將誰尋

欲買爾家田歸種三頃稻因營山前宅遂作泗濱老竒  
窮少成事飽暖未應早願輸橐中裝田家近無報平生  
百不遂今夕一笑倒它年數畝宮懸知迫枯槁

梁園久蕪沒何以奉君遊故城已耕稼臺觀皆荒丘池  
塘塵漠漠鴈驚空遲留俗衰賓客盡不見枚與鄒輕舟

舍我南吳越多清流

次韻劉貢父登黃樓懷子瞻二首

青山開四面白水遶三隅  
野濶時聞潁人間舊據梧  
畫船留上客遺迹問田夫  
事少日常飲才疎世未湏  
決河初洊至勝事偶相俱  
燕子卑無取滕王遠可撫  
飛濤隱睥睨落日麗浮圖  
同舍新持節專城敢遽呼  
未迎行部駕已放下淮艫  
試問登消暑如何楚與吳

吳興有消暑樓

再和

藹藹才名世駸駸日轉禺一時同接浙平昔共棲梧攬  
轡真壯士擁旄良大夫塵埃脫縑綬水石慰霜湏勝地  
來相失清樽未暇俱射餘空見帖鑄罷祇觀撫歸計何  
當決徂年貴早圖檻中終為食講上恥聞呼顧我千羊  
毳平生一釣艫微官不須滿也復試遊吳

陪杜亢張恕鴻慶宮避暑

至後雨如瀉晴來熱更多簿書霑汗垢巖石思藤蘿賴  
有祠宮靜時容俗客過老郎無不可公子亦能和道勝

還相接禪迷屢見訶清涼生絕念煩暑散沉痾古木便  
張幄鳴禽巧當歌桃香呈絳頰瓜熟裹青羅飯細經脣  
滑茶新到腹過劇談時自笑飽食更無它適意未應厭  
後遊真若何官居鄰曲沼田畎助清波晚照明疎柳微  
風響衆荷輕舟尚可載小雨試漁蓑

宋城宰韓秉文惠日鑄茶

君家日鑄山前住冬後茶芽麥粒麤磨轉春雷飛白雪  
甌傾錫水散凝酥谿山去眼塵生面薄領埋頭汗匝膚



一吸更能分幕府定應知我俗人無

次前韻

龍鸞僅比閩團釀鹽酪應嫌北俗麤採愧吳僧身似腊  
點須越女手如酥古根遺味輕浮齒腋下清風稍襲膚  
七盃未容留客試瓶中數問有餘無

答孔武仲

飛霜委中林不廢長松綠驚風振川野未省勁草伏我  
貧客去盡君來常不速愧君贈桃李永願報瓊玉我性

本山林苦學筆空禿驂騑塞康莊病足顧乃逐錦文銜  
華藻弊褐非所續家有五車書恨不十年讀濟南昔相  
遇我齒三十六談諧傾蓋間還往白首熟從君飲濁酒  
過我飯脫粟西湖多莢蕪白晝下鴻鵠城西野人居柴  
門擁修竹後車載鴟夷下馬瀉醺醪醉眠卧荒草空洞  
笑便腹踈狂一如此豈望世收錄別來今幾何歸期已  
屢卜西南有薄田茅舍清溪曲耕耘三男子伏膺當自  
足君能遠相尋布衣巾一幅

送吳思道道人歸吳興二絕

一去吳興十五年東歸父老幾人存  
惠山唯有錢夫子一寸閒田曉日暎

遨遊海上冀逢人宴坐山中長閉門  
去住只今誰定是相逢一笑各無言

次韻答陳之方祕丞

南山李將軍足馬獨行獵田中射虎豹  
後騎不容躡丈夫貴自遂老大饒驚懾  
飄搖天地間自視如一葉故人

多東南顧作扁舟涉忽蒙長篇贈幸此傾蓋接時世尚  
新奇詩書存舊業南風吹清汴西去無停楫恨不留君  
談一使衆坐厭新詩苦清壯欲和再三怯東都多名卿  
投刺日盈笈一言苟合意富貴出旬決行看文石階高  
談曳長裾辱贈但茫然知君念疲薶

登南城有感示文務光王通秀才

幽憂隨秋至秋去憂未已城南試登望百草枯且死落  
葉投人懷驚鴻四面起所思不可見欲往將安至斯人

定誰識顧有二三子清風皎冰玉滄浪自前洗竊脂未  
嘗穀南箕儻微似網羅一張設投足遂無寄田深狡兔  
肥霜降鱸魚美造形悼前失式微慙往士憧憧畝丘道歲  
晚嗟未止西山有茅屋鉏耰本吾事

張公生日

是歲己未  
初致仕

少年談王霸英氣干斗牛中年事軒冕徇世仍多憂晚  
歲探至道眷眷懷林丘今年乞身歸始與夙昔酬高秋  
過生日真氣茲一周觀心比孤月視世皆浮漚表裏一

融明萬物不能留顧謂憧憧人斯樂頗曾不嗟我本俗  
士從公十年遊謬聞出世語俛作籠中囚俯仰迫憂患  
欲去安自由問公昔年樂孰與今日優山中許道士非  
復長史傳腹中生梨棗結實從今秋

次韻答張耒

客舟逝將西日夜西北風維舟罷行役坐令鬢如蓬偶  
從二三子步上百尺臺雲煙遍原隰敞恍令人哀山中  
難久居浮沉在城郭欲學揚子雲避世天祿閣浮木寄

流水行止非所期何須自為計水當為我移外物不可  
必惟此方寸心中自有樂事手拊瑟與琴夜吟感秋詩  
惜此芳物零幽人亦多思起坐再三聽白駒在空林  
聲有恥壘盡我一杯酒愁思如雲頽

次王適韻送張耒赴壽安尉二首

綠髮驚秋半欲黃官居無處覓林塘浮生已是塵勞侶  
病眼猶便錦繡章羞見故人梁苑廢夢尋歸路蜀山長  
憐君顧我情依舊竹性蕭疎未受霜

魏紅深淺配姚黃洛水家家自作塘遊客賈生多感慨  
閒官白傅足篇章山分少室雲煙老宮廢連昌草木長  
路出嵩高應少駐孱顏新過一番霜

次韻張耒見寄

相逢十年驚我老雙鬢蕭蕭似秋草壺將未洗兩脚泥  
南轅已何淮陽道我家初無負郭田茅廬半破蜀江邊  
生計長隨五斗米飄搖不定風中煙茹蔬飯糗不願餘  
茫茫海內無安居此身長似伏轅馬何日還為縱壑魚



憐君與我同一手微官骭髀羞牛後請看插版趨府門  
何似曲肱眠甕牖中流千金買一壺櫝中美玉不須沽  
洛陽榷酒味如水百錢一角空滿盃縣前女兒翠欲滴  
吏稀人少無晨集到官惟有懶相宜卧看南山春雨濕  
次韻王適兄弟送文務光還陳

三君皆親非復客執手河梁我心惻倚門耿耿夜不眠  
挽袖忽忽有難色君歸使我勞魂夢落葉鳴堦自相擁  
君家西歸在新歲此行未遠心先恐故山萬里知何許

金方口人卷九  
我欲因君亦歸去清江鬢髯釣魚船修竹平生讀書處  
青衫白髮我當歸咀噍式微慙古詩少年勿作老人調  
被服榮名慰所思

次韻張芻諫議燕集

淮陽卧閣生清風梁園坐嘯囹圄空不知何術解髑髏  
但覺羈客忘樊籠樽罍灑落談笑地塵埃脫去文書聚  
清心漸欲無一事少年空記揮十鍾近傳移鎮股肱郡  
復恐入覲明光宮人生聚散不可料一杯相屬時方冬

浮陽似欲作飛霞想見觀闕瓊花中孝王會集猶可繼

莫嫌作賦無枚翁

聖民昔知陳州  
余嘗從之遊矣

### 臘雪五首

長恐冬無雪今朝忽暗空細聲聞蔌蔌遠勢望濛濛濕  
潤猶兼雨傾斜半雜風豐登解多事歡喜助三農

### 其二

驕陽不能久密雪自相催急霰初鳴瓦飛花旋集臺看  
人消瘴疫覆麥長根芽欲試樽中物門前問客來

其三

久有歸耕意西山百畝田雪來殊不惡酒熟自相便一  
被簾裳裏長遭羅網牽飛雲迫殘臘愁思渡今年

其四

憂愁不可緩風雪故相撩試問五斗米能勝一束樵耕  
耘終亦飽哺啜定誰邀寒暑不須避傾危且自遙

其五

雪霜何與我憂思自傷神忠信亦何罪才名空誤身歸

來聊且止老去莫逢嗔樽酒它年事相看醉此晨

次韻王適雪晴復雪二首

驕陽得一雪踰尺應更好晨興視窓隙驚見晴霞杲九  
衢無停迹狼籍湏一掃空餘浩然氣凜凜接清昊餘寒  
薄虛室一靜解羣燥晨炊晚未供客饋慙草草試脫身  
上衣行問酒家保孤吟擊槁木大笑稱有道人生但如  
此富貴何用禱所思獨未見耿耿屬懷抱

其二

同雲自成幄飛雪來無根一為清風卷坐見東方暎重  
陰偶復合飛霰滿南軒油然青春意已見出土萱老病  
一不堪惟恃濁酒溫開戶理松菊掃蕩無遺痕卷舒朝  
夕間誰識造化元乾坤本何施中有神怪奔萬物極毫  
末顛倒何足掀老農但知種荷鋤理南園

送呂由庚推官得替還洛中二首

君家相國舅元勳凜凜中丞繼後塵談笑二年同幕府  
風流一倍愈它人南都去後少佳客西洛歸來多老臣

我亦宦遊無久意它年松竹許相鄰

洛水留人一向乾雪泥濫路十分寒送行我豈無樽酒  
多難君知久鮮歡回首祇應憐老病凌風爭看試輕翰  
到家定見嵩陽老問我衰遲未解官

司馬君實提舉  
嵩山崇福宮

四十一歲歲暮日歌

小兒不知老人意賀我明年四十二人生三十百事衰  
四十已過良可知少年讀書不曉事坐談王霸了不疑  
脂車秣馬試長道一日百里先自期不知中途有陷穽

山高日莫多棘茨長裾大袖足鉤挽却行欲返筋力疲  
蝮蛇當前猛虎後脫身且免充朝饑歸來掩卷淚如雨  
平生讀書空自誤山中故人一長笑布衣脫粟何所苦古  
人知非不嫌晚朝來聞道行當返四十一歲不可言  
四十二歲聊自還

次韻子瞻繫御史獄賦獄中榆槐竹栢

秋風一何厲吹盡山中綠可憐凌雲條化為樵夫束凜  
然造物意豈復私一木置身有得地不問直與曲青松



未必貴枯榆還自足紛然落葉下蕭條愧華屋

右榆

盛衰日相尋循環何曾歇攀條擘柔荑回首驚脫葉綠  
槐陰最厚零落今存英十林一枯槁平地三尺雪草木  
何足道盈虛視新月微陽起泉下生意未應絕

右槐

故園今何有猶有百竿竹春雷起新萌不放牛羊觸雖  
無朱欄擁不見紅塵辱清風時一過交戛響鳴玉淵明

避紛亂歸嗅東籬菊嗟我獨何為棄此北窻綠

右竹

曲如山下藤脆若溪上葦春風一張王秋霜死則已胡  
為南澗中辛勤種栢子上枝撓雲霓下根絞石齒伐之  
為梁棟歲月良晚矣白首閱時人君看柱下史

右栢

次韻子瞻贈張慙子

得罪南來正坐言道人閉口意深全天遊本自有真樂

昇穀誰知定不賢  
構火噉噉初吐日  
飛流袞袞旋成川  
此心此去如灰冷  
肯更逢人問復然

過龜山

再涉長淮水驚呼十四年  
龜山老僧在相見一茫然  
僧老不自知我老私自憐  
驅馳定何獲少壯空已捐  
掉頭不見答笑指岸下船  
人生何足云陵谷自變遷  
當年此山下莫測千仞淵  
淵中械神物自昔堯禹傳  
帆檣避石壁風雨隨香煙  
爾來放冬汴冷沙漲成田  
塞裳六月渡

中流一帶牽俯首見砂礫羣漁捕魴鱸父老但驚歎此  
理未易原何況七尺軀不為物所旋衆形要同盡獨有  
無生全百年爭奪中擾擾誰相賢

放閘二首

畫舫連檣住清流汎閘平忽看銀漢落仍聽夏雷驚正  
施遲回久開頭取次輕滯留初一快奔駛忽如傾不識  
風濤恐聊同枕席行行逢賤魚稻飽食慰平生

其二

聞空非有礙水靜為誰興  
開閉偶然異喧飀自不勝淵  
停初鏡淨勢轉忽雲崩  
脫隘尚容與投深益沸騰  
玉山紛破碎陳馬急侵陵  
挾版千鈞重浮舟萬斛升  
岸搖將落木魚困或投罾  
洶湧曾誰止蕭條遠欲凝  
力爭知必折少待亦何能  
一發臨流笑微言早服膺

次韻王適細魚

羣魚一何微僅比毛髮大  
嬉遊極草草鬚鬣自箇箇  
造物賦羣形偶然如一唾  
吞舟雖云巨其樂不相過  
若言

無性靈還知避船施

高郵別秦觀三首

濛濛春雨濕邗溝  
蓬底安眠晝擁裘  
知有故人家在此  
速將詩卷洗閒愁

筆端大字鴉棲壁  
袖裏清詩句琢冰  
送我扁舟六十里  
不嫌罪垢汙交朋

高安此去風濤惡  
猶有廬山得縱遊  
便欲攜君解船去  
念君無罪去何求

召伯埭上斗野亭

細雨添春色微風淨牕流徂年半今世生計一扁舟飲  
食隨魚蟹封疆入斗牛江波方在眼轉覺此生浮

次韻鮮于子駿遊九曲池

天高山近海春盡草生池木黍多新恨川原自昔時花  
存故苑麗樵出舊城藜藿莫望瓜洲渡曾經駐佛狸

揚州五詠

九曲池

嵇老清彈怨廣陵隋家水調繼哀音可憐九曲遺聲盡  
惟有一池春水深鳳闕蕭條荒草外龍舟想像綠楊陰  
都人似有興亡恨每到殘春一度尋

平山堂

歐陽永叔所建

堂上平看江上山晴光千里對憑欄海門僅可一二數  
雲夢猶吞八九寬簷外小堂陰蔽芾壁間遺墨涕洟瀾  
人亡坐使風流盡遺構仍須子細觀

蜀井

在大明寺



信脚東遊十二年甘泉香稻憶歸田行逢蜀井恍如夢  
試煮山茶意自便短綆不收容盥濯紅泥仍許置清鮮  
早知鄉味勝為客遊宦何須更着鞭

摘星亭

迷樓  
舊址

關角孤高特地迷迷藏渾忘日東西江流入海情無限  
暮雨連山醉似泥夢裏興亡應未覺後來愁思獨難齊  
只堪留作遊觀地看遍峰巒處處低

僧伽塔

山頭孤塔閔真人云是僧伽第二身處處金錢追晚供  
家家蠶麥保新春欲求世外無心地一掃眉中累劫塵  
方丈近聞延老宿清朝留客語逡巡

題杜介供奉熙熙堂

門前籍籍草生徑堂上熙熙氣吐春遮眼圖書聊度日  
放情絲竹最關身年來馮脫烏皮几客去時乾漉酒巾  
卜築城中移榜就休心便作廣陵人

遊金山寄揚州鮮于子駿從事邵光

揚州望金山隱隱大如幙  
竭來長江上孤高二千尺  
僧居厭山小面面貼蒼石  
虛樓三百間正壓江潮白  
清風歛霽霧曉日曜金碧  
直侵魚龍居似得鬼神役  
我行有程度欲去空自惜  
風吹渡江水山僧午方食  
波瀾洗我心苟蕨飽我腹  
平生足遊衍壯觀此云極  
鐵甕本誰安海門復誰植  
東南遞隱見遙與此山匹  
茲遊幾不遂深愧幕府客  
歸時日已莫正值江月黑  
顧視天水并坐恐星斗濕  
使君何時罷登覽不可失

初至金陵

山川過雨曉光浮  
初看江南第一州  
路繞匡廬更南去  
懸知是處可忘憂

樂城集卷九